

滑伯仁先生

滑壽字伯仁。先世襄城人。徙儀真。後又徙餘姚。幼警敏好學。日記千言。操筆爲文詞。有思致。尤長於醫。京口名醫王居山。容儀真壽從之學。授以素問難經。壽卒業。乃請益曰。素問詳矣。猶書多錯簡。愚將分藏象經度脈候病能攝生論治。色脈鏡刺陰陽樞本運氣索萃。凡十二類。抄而讀之。難經又本素問靈樞其間榮衛藏府與夫經絡腧穴辨之博矣。而缺誤或多。愚將本其義旨。注而讀之。何如。居中躍然曰。甚矣。子之善學也。速爲之。壽晨夕研究。參會張仲景劉守真李明之三家。又學鍼法於東平高洞陽。盡得其術。嘗言人身六脈。雖皆有繫屬。惟督任二經。則包乎腹背。而有專穴。諸經滿而溢者。此則受之。宜與十二經並論。乃取內經胃空諸論。及靈樞所述經脈。著十四經發揮三卷。通考隱穴六百四十有七。他如清傷寒論抄診家樞要癰疽篇。及採諸書本草爲醫韻。皆有功於世。又壽所著難經本義二卷。採摭凡十一家。令惟壽書傳於世。其書前列案考一篇。論書之名義源流。次列問訣總類一篇。記脫文誤字。又次圖說一篇。皆不入卷數。其註則融會諸家之說。而以己意折衷之。辨證精核。考證亦詳審。晚自號櫻窗生。年七十餘。卒於洪武中。天台朱右爲之作櫻窗生傳。其子孫散居餘姚武林間。而武林爲最盛。

滑伯仁醫案目錄

傷寒	一
暑證	二
瘧痢	五
血證	五
衄血	六
痞滿	六
怔忡	七
痢	七
痰	八
產後	八
疝	九

滑伯仁醫案

武進徐衡之編纂
嘉定姚若琴

嘉善俞震東扶評注

嘉定張壽顯山雷平議

傷寒

一人七月內病發熱。或令其服小柴胡湯必二十六劑乃安。如其言服之。未盡二劑。則升發太過。多汗亡陽。惡寒甚熱。肉瞤筋惕。乃請伯仁診視。脈細欲絕。卽以真武湯七八服稍愈。更服附子七八枚乃痊。

平議。小柴胡湯而謂必連服二十餘劑。可見醫學黑暗。自昔已然。無怪鄉曲庸愚。止知發汗。古方連用十餘帖而不知變計也。此案筋惕肉瞤而更寒甚。則非真武一劑可愈。以視上條症情輕重固自不侔。

一人七月內病發熱多服小柴胡湯惡寒甚。肉瞤筋惕。伯仁診之。脈細欲絕。曰此升發太過。多汗亡陽。表虛極而惡寒甚也。肉瞤筋惕者。裏虛極而

陽不復也。以真武湯進七八服而愈。

潘子庸得感冒證已汗而愈數日復大發熱惡寒頭痛眩暈嘔吐却食煩滿欬而多汗滑診其脈兩手皆浮而緊在仲景法勞復證浮以汗解沉以下解爲作麻黃葛根湯三進更汗旋調理數日愈其時衆醫以病後虛憊且圖溫補伯仁曰法當如是因違衆用之。

一人病傷寒已經汗下病去而背獨惡寒脈細如線湯熨不應伯仁以理中湯加薑桂附子大作服外以萆撥良薑吳茱萸桂椒諸品大辛熱藥爲末薑汁調敷滿背以紙覆之稍乾卽易如是半月竟平復不寒矣此治法之變者也。

震按此以熱藥外敷又開一法。

暑證

臨安沈君彰自汗如雨不止面赤身熱口燥心煩居樓中當盛暑帷幕

周密自云至虛亡陽服朮附藥已數劑伯仁診其脈虛而洪數視其舌上胎黃曰前藥誤矣輕病重治醫者死之素問曰必先歲氣毋伐天和朮附之熱其可輕用以犯時令耶又曰脈虛身熱得之傷暑暑家本多汗加以剛劑脈洪數則病益甚悉令撤幔開窗初亦難之少頃漸覺清爽爲製黃連人參白虎等湯三進而汗止大半諸證稍解又兼以既濟湯渴用冰水調天水散服七日而病悉去後徧身發瘍疹更服防風通聖散乃已

平議此是陽明熱證自汗面赤煩熱燥渴舌黃而脈洪數何以謂是亡陽且服朮附此病家相知醫書而全不識症之咎妄投藥餌寧不自殺而有餘凡紳衿家案有數冊醫書往往蹈此習氣可笑亦最可怕伯仁人參白虎之法對症發藥亦是平平無奇但三進之後何以反用竹葉石膏加附子三五分之既濟湯一方見石頭醫通十六卷白虎湯條豈仍迎合病家之意耶後發瘡瘍則附子之毒尤其確據然熱毒外泄尙是此人之幸設內攻變證禍必更劇防風通聖泄熱下奪猶爲正治然方中防風麻黃亦非夏秋熱病所宜

一人暑月病身冷自汗口乾煩躁欲坐臥泥水中脈浮而數按之豁然空散按之不鼓諸陽皆然此爲陰盛格陽得之飲食生冷坐臥當風所致以真武湯冷飲一進汗止再進躁除三服而安。

平議身冷自汗已是陰盛無陽則煩躁口乾反而喜冷惡熱尤爲內有真寒逼陽外越之候爰脈浮數無根更是浮陽無依之確據乎真武湯冷服不致爲假熱格拒不入用法之巧似在白通加附片之上回陽之劑一帖可效不須多服以本身有浮陽在外招之可以卽來不比上條惡寒已甚內外皆寒非多服附子不爲功也。

一人暑月泄瀉小便赤四肢疲困不欲舉自汗微熱口渴且素羸瘠醫以虛勞將峻補之伯仁診視六脈虛微曰此東垣所謂夏月中暑飲食勞倦法宜服清暑益氣湯投二劑而病如失。

震按自汗微熱口渴溺赤在暑月自屬中暑形象四肢困倦不欲舉固虛也亦卽暑傷氣也法本宜補而峻補則暑不能清仍未入穀故清暑益氣湯效最速。

瘧痢

一婦年五十餘患瘧寒熱涌嘔中滿而痛下利不食殊困頓醫藥不效伯仁診其脈沉而遲曰是積暑與食伏痰在中當下之或曰人疲倦若是且下利不食焉可下方擬進參附滑曰脈雖沉遲按之有力雖利而後重下迫不下則積不能去病必不已乃以消滯丸微得通利覺少快明日再服之宿積腸垢盡去向午即思食旋以薑橘參苓淡滲和平飲子調之旬餘乃復

震按此條瘧痢兼嘔竟以消導藥愈較之專以發散藥愈者可作兩大局但須看眼中滿而痛脈沉有力知其病在裏不在表也

血證

一人盛暑出門途中吐血數口亟還則吐甚胸拒痛體熱頭眩病且殆或以爲勞心焦思所致與茯苓補心湯伯仁至診其脈洪而滑曰是大醉飽胃血壅遏爲暑迫血上行先與犀角地黃湯繼以桃仁承氣湯去瘀血宿積

後治暑即安

衄血

一婦體肥而氣盛。自以無子。嘗多服煖宮藥。積久火盛。迫血上行。爲衄。必數升餘。面赤。脈躁疾。神恍如癡。醫者猶以上盛下虛丹劑鎮墜之。伯仁曰。經云上者下之。今血氣俱盛。溢而上行。法當下導。奈何實實耶。卽與桃仁承氣湯。三四下。積瘀去。繼服旣濟湯二十劑而愈。

痞滿

一人苦胸中痞滿。憤憤若怔忡狀。頭目昏痛。欲吐不吐。忽忽善忘。時一臂偏痺。脈之關以上溜而滑。按之沉而有力。曰。積飲滯痰。橫於胸膈。蓋得之厚味。醕酒肥膩。炙搏蓄熱而生。溼溼聚而痰涎宿飲。皆上甚也。王冰云上。甚不已吐而奪之。但冬月降沉之令未可行此法。乃候至春日晴朗。以藥探吐之。大吐異色痰如膠飴者三四升。一二日更吐之。三四次。則胸中洞爽矣。

震按。此病認爲痰飲。皆人所能。惟冬月降沉之令。未可涌吐。乃先聖成法。守得極是。

怔忡

一人病怔忡。善忘。口淡舌燥。多汗。四肢疲軟。發熱。小便白而濁。衆醫以內傷不足。擬進葷附等藥。未決。脈之虛大而數。曰。是由思慮過度。厥陰之火爲害耳。夫君火以名。相火以位。相火代君火行事者也。相火一擾。能爲百病。百端之起。皆由心生。越人云。憂愁思慮則傷心。其人平生志大心高。所謀不遂。抑鬱積久。致內傷也。服補中益氣湯。硃砂安神丸。空心進小坎離丸。月餘而安。

震按。怔忡本非重病。而居官者多患之。因勞心太過。或兼驚憂所致。治法不外養血安神補元鎮怯。然亦難效。莫若拋棄一切。淡然漠然。病自肯去。老子曰。內觀其心。心無其心。廣成子曰。毋勞爾形。毋搖爾精。毋使爾思。慮營營豈惟卻病。并可長生。

癰

一僧病發狂譫語。視人皆爲鬼。診其脈。纍纍如薏苡子。且喘且搏。曰。此得之陽明胃實。素問云。陽明主肉。其經血氣並盛。甚則棄衣升高。踰垣妄言。遂以三化湯三四下。復進以火劑。乃愈。

痿

一婦始病瘧。當夏月。醫以脾寒胃弱。久服桂附等藥。後瘧雖退。而積火熾熾。致消穀善飢。口數十飯。猶不足。終日端坐如常人。第目昏不能視。足弱不能履。腰跨困軟。肌肉虛肥。至初冬。伯仁診之。脈洪大而虛濡。曰。此痿證也。長夏過服熱藥所致。蓋夏令溼。當權剛劑太過。火溼俱甚。肺熱葉焦。故兩足痿易而不爲用也。遂以東垣長夏溼熱成痿之法治之。日食益減。目漸能視。至冬末。忽下榻行步如故。

震按。東垣長夏溼熱成痿。法卽清燥湯也。用於此證最妥。可謂喜用辛燥熱藥者戒。

產後

一產婦惡露不行，臍腹痛，頭疼，身寒熱，衆皆以爲感寒，溫以薑附，益大熱。手足搖擗，語譫目竄，診其脈弦而洪數，面赤目閉，語喃喃不可辨，舌黑如焰，燥無津潤，胸腹按之不勝手，蓋燥劑搏其血，內熱而風生，血畜而爲痛也。曰：此產後熱入血室，因而生風，卽先爲清熱降火，治風涼血。兩服頗爽，繼以琥珀牛黃等，稍解人事，從以張從政三和散，行血破瘀。三四服，惡露大下，如初時，產已十日矣，於是諸證悉平。

疝

一婦寒疝，自臍下上至心，皆脹滿攻痛，而脇疼尤甚，嘔吐煩懣，不進飲食，脈兩手沉結不調。此由寒在下焦，宜亟攻其下，毋攻其上，爲灸章門氣海中脘，服延胡桂枝，佐以蘘木諸香，茯苓青皮等，十日一服，溫利丸藥聚而散之也，果效。